

COMUNICATO n. 2139 del 20/08/2024

Traduzione in cimbrio

Aftn européan Forum vo Alpbach da artifizziàl inteligentz, oportunitét un riskie

[Cimbrio] Bia 'z barta sbern da artifizziàl inteligentz (AI) aftn Euregio Tiról-Südtiról-Trentino un afte kamöündarn iz gest dar earst argomént von Tage von Tiról bodase iz gehaltet an sunta atz 18 von snitt drinn in européan Forum vo Alpbach (EFA). Dar öffnung pittnándar pinn vorsitzar von Euregio un vodar autonome Provìntz vo Poatzan Arno Kompatscher, soinda gest dar hauplántsmánn von Tiról, Anton Mattle, dar vorsitzar vodar autonome Provìntz vo Tria, Maurizio Fugatti, un dar vorzitzar vo EFA, Andreas Treichl, darná soinsase alle gevuntet aftn Euregio Summit bodase iz gehaltet in Kongrèss Zentrum vo Alpbach. 'Z izta khent geredet übar etische tème, sicharhait un sotziàl impakt un vo bia da AI mage khemmen genützt in di öffentleschen vüarom.

Alle soinsase gevuntet dakòrdo zo khöda ke AI hatt sa an konkrètegen impakt afte kamòuschaft, afte ekonomì un afte ètik. In da gelaichege zait iz an oportunitét vor in Euregio, ma di mocht khemmen geschètzt un gevüart aftnan djüstn bege, gebantese in di hent vo profesionìstn un stianante nâ in internatzionàln standard.

“Da artifizziàl Inteligentz mage soin ågenump pitt groazan ångst odar pitt groaza pegaistarung. Daz peste steat azpe hërta in di mitte”, asó hatta khött dar Kompatscher. “AI mage pezzarn ünsar lem un auzrün sachandarn bobar njânka nonet khennen. Però stian lai zo paíta un khön steabar z'sega bazta vürkhint, magat soin perikolosat ombrómm AI gitt nèt zuar auzpezzarung von lest momént. Ma mocht auzmachan hoatre regln un nia lazzan gian ar a bege in mentschliche faktor”.

Dar vorsitzar Fugatti grüazante hatt khött ke atz Alpbach “redetma vo stòrdja un futuro, ma redet vo traditziong un vornaügarung un dise tème zoang di pintom boda iz zbisnen in drai lentar”. Vor bazta ågeat in tème boda iz khent auzgeredet in trèff vo haüt dar vorsitzar hatt no khött: “Azpe vor alle di naüing sachandarn AI o trakk oportunitét un riskie un zo vorstiana pezzar aniaglaz vo üs – saiz pürgar, firme, odar öffentleschan vüarom – iz gerüaft zo khenna bia 'z stianda di sachandarn un zo bizza bazzez iz djüst disar naüge instrumént. In Trentino hattma ågeheft nâzosüacha übar AI no vor viartzekh djar, drinn in a groaza bett boda haüt khint vürgetrakk vodar Stiftung Bruno Kessler, un in di zait soinda khent gevuntet konkrètege soluziotzionen vor di lântbichtscahrt un vor vil åndarz. Asó pinne sichar ke ünsarne lentar boda sa hãm a groaza kompeténtz, bartn soin guat zo nemma disa oportunitét boda di AI trakk nâ un schaug zuar in futuro pitt naüga pegaistarung”.

Dar hauplántsmánn Mattle hatt gedenkht ke “zo macha az saibe sichar nüzan AI mochtma haltn kunt vo mearare questiongen ètische un sotziàln un vorstian bele 'z magatnz soin di riskie. Ma bar mochan hãm in koradjo zo nütza disa naüge teknododji boda bart sichar stian in di djardar boda khemmen un nützanse zo haba guatz”.

Pinn Tage von Tiról hatta ågeheft EuregioLab: in di tang boda khemmen a zbuantzekh espèrte bartn drauren bia zo nütza AI in Euregio.

Foto un pildar von Euregio

Download pildar un interviste [da](#)

Übersetzt von Schaltarle vor di zung von Toalkamou vodar Zimbar Hoachebene

(cdt)